

四庫全書

集部

欽定四庫全書

集部

東里續集卷三十三

詳校官檢討

臣

羅國俊

中書

臣

劉源溥覆勘

總校官進士

臣楊懋珩

校對官庶吉士

臣毛鳳儀

謄錄監生

臣桑英

欽定四庫全書

東里續集卷三十二

明 楊士奇 撰

墓表

封從仕郎中書舍人金君墓表

近十數年士大夫有自三吳來者數為予言得茹清蹈  
潔君子兩人而侍郎周君言之加悉其一江陰嚴志道  
其一華亭金文鼎皆吾故人志道嘗仕于朝矣文鼎受  
勅封官矣志道凜然冰蘖之操文鼎恭然和夷之度皆

未老而歸於鄉歸則皆逸於曠閒幽遠之濱未嘗一涉  
意塵事一濡迹守令之庭吾素高此兩人嘗寄詩寓嚮  
往之意聞得詩皆喜而皆不見答以是益高之思得一  
握手慰契闊而今文鼎之訃遽至為之悵悵累日其子  
鈍遂來請文表墓予忍以辭按大理少卿沈君狀金之  
先汴人宋之南遷也從渡江而居淞之華亭遂世為華  
亭人文鼎諱鉉文鼎其字尚素其別字也其考仲能博  
學守道絕意聲利母馬氏有賢行文鼎天資聰敏自幼

嗜學不效於外慕成童喪父哀毀動人而致孝其母洪武中徵居京師奉母以行母時年六十餘侍養甚適母安之而忘去鄉之思也母病晝夜侍藥食不去側越數月不懈母病瘥而喪明文鼎益痛切奔走求良醫藥竭其心力母目竟不復自是飲食之奉皆嘗而後進雖迫公務不廢有欲薦其才者懇以母辭母年八十餘終哀毀如喪父歲時薦祭未嘗不泣下霑襟與人交盡誠勇於義事率以為分內當然鄉人陸士原疾革托其子若

姪於文鼎曰我死此曹必緣利牴牾幸先生善道之我死不敢忘也已而果牴牾文鼎召至面喻之曰不見爾父兄弟素相恭愛耶奈何遽背之反覆曉譬之陸子姪皆悟改行相親睦友人丘德潤死而親老子幼為周給其家而教其子其行槩類此為人瀟灑絕俗不苟交際喜吟咏有古詩人之趣餘趣作書畫皆極造詣居南京數十年作小樓中書舍人王孟端寫竹數十挺其中扁曰清風高人韻士過之必延登樓焚香鳴琴酌酒賦詩

脩然山林泉石之適也家居篤於教子至形諸詩咏以垂于後宣德三年以子貴封從仕郎中書舍人既受勅命即束書冊入上海僻處不與俗流接鈍嘗請於朝歸省及辭還京躬送至丹陽臨別語鈍惟致敬臣職以先父母脫不復再見汝永念斯言後三年文鼎卒正統元年閏六月廿四日也享年七十有六以卒之明年三月十三日葬邑之蒲溪之原所著有鳳城藁尚素齋集藏于家配倪氏子男二長即鈍工法書累官中書舍人次

銳女二鍾真劉愷其壻也孫女三嗟夫九峯三泖其清  
泚之氣鍾於人而為通敏博辯智巧之才馳六藝之華  
擅幹濟之譽者多矣而求居貞履坦志澹而樂素若文  
鼎蓋亦無幾人吾安得不為之表哉安得不為之表哉

故寧晉知縣郭子昭墓表

公諱晉字子昭一字士昭姓郭氏其先出中書令子儀  
之子曖之後有曰源宋仁宗時歐陽公脩薦其博學有  
材辭不就徵事載郡志及其家乘公之始遷泰和祖也



鄉貢進士宋傑太學生蠡又公之六世七世祖也曾祖  
道傳泰和州學錄祖建中累官江華縣尹考宗大為邑  
碩儒學者稱峻極先生公生而身長玉立風采凝重鄉  
先生陳心吾嘗稱之曰其質溫溫其言恂恂其動撫謙  
其文雅馴郡太守湯槃亦稱之曰目其貌丰神峻整耳  
其言詞氣溫粹叩其學沿流沂源通暢融液洪武五年  
中江西鄉試第五人明年會試中教官選授永豐縣學  
教諭在學六年其弟子負率皆成就歌鹿鳴而升者倍

於前科洪武十二年太守湯槃以述職入覲太祖皇帝御華蓋殿賜百官食勅守臣各舉明經士為用遂以公應命公既被召擢任中書省掌記時中書胡汪二丞相蒞事公盡贊畫之玅克稱意故每遇政暇輒與談論經史商確政事由是深嘉之屢言於上上乃召見錫以宴仍賜衣一襲將畀以重任適二丞相鍾奇禍而相繼族滅中書省亦罷設公得降知寧晉縣朝之士大夫咸惜之謂其材方見知而弗克大用公聞之怡然曰命也何

用惜為即日就道士奇從伯父貢外公自立公之姻兄  
不忍其別率諸同列賦詩以贈翰林承旨宋公漁為之  
序寧晉為真定之屬邑舊地雖曠而居甚少耕治不徧  
而多未闢公至之日悉召他處之民勸之樹藝約三年  
而收其租不數歲桑麻蔽野黍稷連阡地無尺寸之棄  
賦稅增倍歲大旱民禱久不應公即日齋沐至誠禱焉  
越二日大雨霑足後二年復旱公復自致禱雨亦如之  
縣之民失火將延及官廨公叩頭向之火尋滅學舍頽

敗公為新之人不樂學生徒廩食十數年有不通知語  
孟章句者公稍暇輒詣學督諸生為之啟諭誘掖由是  
材皆有成而科不乏人經四歲丁內艱服闋適縣學訓  
導缺諸生請於縣令徐遜曰郭先生博學篤行誠宜為  
經師乞留以署其職侯請於公公遂留焉裁數月朝廷  
有旨民間有弊病悉許自詣京面奏鄉不逞翕然成風  
竟誣公以罪卒公通詩經深得六義之旨當時從游者  
甚衆若進士姚與誠蕭放皆其徒也其經義之著雅正

典贍今沒雖數十年尚有傳而錄之以取法焉尤善詩  
惜其藁失不存年四十有七配蕭氏有令德子二人興  
讓興文皆不失儒行興文舉明經使於四方將有錄矣  
孫男五植脩勉俊遜公初歿時屬以倉卒藁葬故址傍  
既葬二十年乃命興文屬余表其墓余生晚不足究知  
公之萬一公兄子益先生士奇從姑夫國初被徵授之  
官以疾辭歸時邑先正老成應召者卒皆就仕居家者  
凋喪殆盡如先生存者僅一二人遠近之趨以求教者

紛集余幼孤亦嘗受業於其門荷公之誨尤為多興讓  
興文又皆同學而最莫逆故不敢謝不敏而不表也謹  
述其所知大槩而為之表庶俾其後人知永久而不忘  
焉

楊彥威墓表

吾楊氏宋盛際自吉水楊莊徙泰和又六世至尚真府  
君二子皆承事郎伯德明仲德寬始析二派子孫日繁  
豐腴甲一邑而詩書禮義之傳襲不衰益盛奕然為邑

之望德明子英才梅卿皆舉鄉貢梅卿曾孫率齋岫雲  
益齋皆舉漕貢授登仕郎子孫益繁鄉稱三登仕家率  
齋子容齋容齋子遠峰遠峰子師魯師魯三子子尚子  
脩子友子尚二子彥威其仲也諱德同蚤喪父事母嚴  
氏孝事二叔及兄彥素從兄彥實咸致愛敬與二兄同  
處彥威一舉動必稟二兄乃行二兄亦親愛彥威如彥  
威之於兄也彥威以恭儉持己以忠信待物邑嘗推擇  
為耆老俾持平於鄉人服其公閒居手不釋卷凡洪武

至宣德所下詔勅令諭率謹輯錄為書用時披閱服膺  
嘗曰此君上所以福下人者敢忽忘乎篤於教子恒勵  
之曰不可墜爾先世宣德丁未五月廿日以疾卒年五  
十有四娶郭氏子男三挺拱撫挺今為都察院檢校女  
五高寧蕭禎曾崇胡永嚴書其壻也孫男二儉儼女一  
彥威吾族子也吾官南京時以運賦至過宿譚論數夕  
娓娓皆中理蓋吾甚重之語云宗族稱孝鄉黨稱弟彥  
威殆其人歟別數歲聞其卒為悼歎不已至是挺求文



表墓故書其先所自及其行之槩以示其後使圖無忝云

贈太醫院使袁君墓表

余仕於朝三十年同朝自六卿及近侍諸司凡其正貳操行賢否才藝高下槩知之至同寮同志相資相悅如一家兄弟若太醫院判袁士珍蔣用文者寡矣士珍家蘄春用文家儀真中歲相值為同官輒相親愛士珍明爽果毅用文溫恭詳雅兩人於職事能各遜所長而虛

心相從始終未嘗一毫異意而距數月兩人皆卒初仁宗皇帝在春宮余為諭德與士珍用文同侍監國者最久有往還之好用文歿既表其墓士珍墓嘗許為表屬久未暇忽今八年然心未嘗忘也士珍袁氏諱寶士珍字也其父仲和母戴氏士珍事父母孝洪武中父名傳兵籍當行士珍甫成童請代行所司以其孱弱不聽士珍彊激厲為精悍作氣揚揚乃聽之既至京師選克樂舞生從太宗文皇帝之國于燕時金華戴原禮以名醫

召至士珍奉旨從授醫業後從入金華山中往來十餘  
年遂得丹溪朱彥脩之傳文皇帝靖內難躬親兵革者  
數年士珍皆侍行有保和功內難平授承直郎太醫院  
判進承德郎士珍事上小心敬慎一時勲臣貴戚之家  
有疾率走迎之無不效者或貧與賤者以急告亦趨赴  
未嘗責報而雅厚文學士士多德之士珍處人以誠人  
有過不為苟容能改輒懽然相親無宿怨意蒞事人服  
其公於利取予必度義永樂廿二年十月十二日卒春

秋六十有二訃聞仁宗皇帝悼惜不已賜賻及棺命有司給舟車遣中官護喪葬南京安德門外明年五月贈太醫院使遣官賜祭備始終之恩云士珎娶馬氏賢而能家後六年卒合葬于夫之墓子男三瑛瑾理女三孫男若干先是四方士以醫召至隸太醫者累千人皆能道袁蔣之德暨卒皆追慕之至于今未已或有窘恙輒嗟咨相謂袁蔣在吾屬不及此此豈音聲笑貌之所能為哉蓋士珎之所可重非獨其醫之良也雖當時士大

夫多知之而不若余知之深也遂為之表

孫處士墓表

國子博士孫子敏於余有斯文之好一日求表厥考處士君之墓蓋余嘗聞處士之行於太常楊公處士之墓公銘之表余何辭處士諱真字文俊世家吾郡之安福父春庭隱居教授母周氏父母皆有善行處士自幼不凡事父母孝既長惇行古道見重於先生君子元季之亂挈妻子避兵荆襄間遂家石首雖時寇盜不寧而勤

學弗輟簡冊未嘗去手所至人愛重之洪武初縣令丞  
舉明經力辭乃請教社學力以成就後進為務束脩一  
無所問或曰在孔子所不廢也處士曰聖人斯道之重  
宜然我幸人之從吾言以入於善敢他計哉其教學者  
必在脩己及物由義安命或譏其不仕者處士曰人窮  
達有命且吾寧不自知所不足哉為人平易恭遜簡而  
有容喜愠不色見自居石首未嘗一日不念桑梓語及  
輒流涕然不得如志嘗一歸展省留止不忍去者久之

復至石首無幾卒洪武乙亥三月庚辰日也享年七十  
有四配安福劉氏柔婉恭肅孝行篤至躬勤約為內助  
如處士之心後四年之四月庚申卒享年七十有二合  
葬石首縣南馬鞍山之原子男三長子和次子敏和厚  
端謹由巫山縣學教諭嚴州府學教授陞博士觀博士  
亦可以知處士之成於家者矣次子敬女二皆有歸孫  
男八曾孫男六嗚呼士習益下平居不務自脩稍有尺  
寸之長沾沾意懽而望其推一毫以及人彊固閉匿不

肯出有不為此則責報汲汲不啻饑渴之於食飲於眎  
孫處士之行蓋氷炭薰蕕之不可同矣孫處士其古之  
人歟其古之人歟

劉仲高墓表

仲高諱昂姓劉氏吉安泰和人其先世見余所序宗譜  
父存善樸靜自足號愚村母羅氏三子仲賢仲良季仲  
高也自幼警敏有智能動其老長倫輩莫及也讀書通  
大義而篤於孝弟之行家故饒裕稍壯慕閒居之適嗜



琴時閉戶焚香操數引自娛前翰林學士解公嘗過之  
為記其琴室仲高平生足跡未嘗越百里外惟一入郡  
城輒引去不復出喜賓客名卿貴人過泰和者率延禮  
之里之志同氣合者數人往還觴奕譚笑無虛日善論  
議亦善微言嘲謔襟宇夷曠有犯不校出入鄉黨不見  
怨惡晚於邑東南五里所珠林江之上作別墅躬漁稼  
之樂時其子已貴而退焉自佚其殆翛然物表者歟春  
秋五十有八而卒其兄弟余少時皆與同學海桑陳先

生之門仲高少余六歲至今或追憶少時而道其嬉戲  
事聞者無不絕倒自余出仕三十有餘年念昔同學惟  
仲高在恒私計幸得謝事歸則相與閭巷旦暮晤聚為  
樂乃遽聞其長逝悵快久之於是其子渙求文表墓仲  
高生於洪武壬子正月廿三日歿於宣德己酉某月日  
其配蕭氏子男五長渙永樂乙未進士兵科給事中揚  
州府經歷次鼎選江西鄉貢未上次升次謙次解女三  
蕭季廉曾公升陳正龔其壻也孫男女皆八仲高之葬

也詳具梁紀善之銘表特著余所重者云

贈中憲大夫都察院右僉都御史羅君墓表

西北二蕃世為邊患善為治者亦備禦之有其道耳皇上臨御以來德懷威服薄海內外罔不摠誠歸化然朝廷不忘武備慎簡廷臣分飭邊防都察院僉都御史羅亨信往蒞甘肅時北邊亦已格心嚮服朝貢之使靡歲不至惟迤西殘寇迫近塞下服叛靡常亨信言此無他蓋由比年邊備廢弛將帥玩愒所致必正之以法庶幾

有所振起遂劾奏陝西行都司都指揮使一人擅沮兵行之罪上是之命兵部尚書馳往覈實如亨信言遂即軍中斬之以徇將士股慄兵勢遂振奮勇窮追斬馘無算渠魁既死餘黨散走西鄙以寧斬一人而千萬人悚懼以奮蓋啟於亨信之言也既報將士功亨信亦被榮賚朝野稱快時亨信之父中憲公訃至亨信奏請歸執喪特命給驛歸治葬畢起復於是亨信還過京師奉所撰事狀求文表墓余覽之嘆曰亨信之克單慮盡言於

國事有裨益矣非其本之於父乎遂按狀為之書曰羅之先居南雄宋季徙東莞之英溪至中憲公七世矣族甚夥襲詩禮皆隱處弗仕中憲曾祖諱德秀祖諱應辰考諱善中憲諱昌字祖昌以亨信貴初封文林郎山西道監察御史其歿也贈中憲大夫行在都察院右僉都御史中憲自少聰敏嗜學躬孝友之行元季兵亂奉父母徙避循惠而奉養如宜洪武初始復故業父母遽相繼卒屬時艱甚葬弗克盡禮銜痛茹苦寢食弗寧及改

厝乃已教育兄孤子均已子彊記問善於譚論於舉故  
實娓娓不窮性耿介不妄交處慷慨有志邑大夫屢欲  
薦之輒辭晚得足疾遂不出家居督僮奴力耕稼給公  
賦自號英溪耕隱卒於正統二年六月十九日享年八  
十有四配黃氏贈恭人先卒今合葬麻地嶺先塋之側  
子男二長亨信次勝瑤蚤卒女一歸梁彥義孫男三女  
六皆適士族亨信永樂二年進士初擢給事中進監察  
御史又進行在都察院右僉都御史有守有為三十餘

年敬慎不懈吾聞中憲公之教亨信也其初學則曰學必期於用世忠君乃所以孝親也及其仕則數寄書勵之持已勤職事勿以親老置念慮能事君則親安矣此非亨信所本歟孔子曰魯無君子斯焉取斯吾於亨信安得不本諸中憲公哉故特書之以告夫世之為人父者

曾春齡墓表

嗚呼此吾友曾君春齡之墓春齡永樂四年進士為翰

林庶吉士五閱月而卒壽不稱其行學未竟於用豈其命也夫春齡世簪纓家宋之時安強為御史有名公卿間至元傳道先生以易經為學者所宗所著書有易變通四書類辯庸學標著為紹興路照磨後家居遇亂鄉郡推舉率義兵禦寇兵敗守節死弟耕道先生為瑞金縣學教諭生九韶國朝洪武初為沔陽黃蓬湖泊官生伯高俱有學行伯高二子春齡其長也次鶴齡兄弟之學皆得於家訓春齡幼時已端重如成人稍長奮勵學



問日益見端緒邑大夫選充博士弟子員蘄然羣居中先生長者多忘年與之交鄉人愛其子弟多遣從春齡游聲譽日起而學日加進永樂乙酉兄弟皆中江西鄉試春齡幼然前列於是鄉人無兄弟同選者久矣有之不出於同產出於同產即不出於同科遂以為曾氏之祥明年鶴齡留侍養春齡獨赴會試禮部選前列廷試賜進士出身授翰林庶吉士時方修永樂大典春齡與所徵四方耆儒碩學任編纂之事衆皆譽春齡學識為

優是年八月以疾卒明年鶴齡始奉襯歸葬春秋年裁三十有三其居家有孝弟之行居鄉有忠信之節溫厚而樂易有愛人之心惜乎未見於用也豈非其命也歟然君子不以其命之所遇而輕重焉余故撮其世及行表於其墓

中憲大夫肇慶府知府王公墓表

永樂十四年瓊州府知府泰和王公丁內艱服闋授肇慶府知府未行七月九日以疾卒於北京其仲子翰林

脩撰直之官舍是時冢子信從行三子奉襯居葬其邑  
西北新山之原葬已其素所從游楊某作而嘆曰嗚呼  
吾泰和文獻數百年來六七故家儒師君子為之綱維  
國朝前三十年王竹亭先生與其弟崇慶太守裒然清  
德正學為邦之望兩先生沒諸老鉅公次第復盡則是  
邦之望不在於公乎今又已矣將士之晚出有志乎是  
其何所取正乎則表先進以儀來今其可無述乎王氏  
出晉司徒導之後自金陵徙泰和宋仁宗朝戶部侍郎

贊及其子億皆以科第進有顯稱其後累累以科第進至天隱臣則公之曾祖祖也考子與即竹亭先生母陳氏繼母李氏公諱泰字伯貞一字之幹天資絕出五六歲對客誦所記書動千餘言不輟口仲父崇慶公尤器重之與竹亭先生蚤莫訓切成童五經四書子史皆通其大義下筆為文章霈然遂進講易於安成劉雲章之門時同門生頗衆劉先生獨推公為穎悟久而嘆曰從游之士其遠到孰如王某哉既冠益有志於四方從仲

父踰五嶺上蒼梧至桂林已而下湘水浮洞庭泝金門  
道三峽之險歷覽巴蜀遂東遊至京師而還其學益充  
文益肆洪武壬戌詔求賢才與論治道縣令丞舉公應  
詔既至授廣東按察使僉事分巡雷州府到官甫七日  
有詔罷分巡召還改工部水部主事未幾丁外艱去後  
坐起復緩謫安慶又起為瓊州府知府其初徵至高皇  
帝親見延問公以易進對稱旨時天下士同徵至者五  
百餘人上親試以經義及時務策擢公第一仍命公考

第其餘高下以聞後在工部上語尚書趙某曰江西秀才王某汝暇宜從之學問公素有負挾又感上知遇益思自效其在雷州咨問民所欲惡即奏雪冤滯恤孤寡防海寇又海北鹽法等弊五事又奏請浚宋寇準所鑿渠引達呂塘之水灌東洋田萬頃以便民後為瓊州瓊州人聞其來喜曰是有遺愛於雷州民者吾輩無患矣公至一務寬大近民先是崖州黎相讎殺衛府皆以反聞且盛言寇結連百餘砦勢張甚請發兵勦戮朝廷如

所言命發兵適公始至衛逼府遣吏為兵嚮導公曰讎殺蠻人常事然未有反狀果如向所奏言即今寇當陷數城矣鄰境尚得無事耶今兵一出即玉石俱碎請覆驗其實發兵未晚衛曰朝命可稽乎公曰某請以身任之衛無與也公察之寧遠縣丞黃童廉平可屬事即令往覆驗童還報如公言且以黎數人首事者偕來遂聞于朝詔止兵不出崖人舉手加額曰微太守吾屬糜爛矣蠻人亦皆感泣曰太守吾父母也不然吾以叛寇死

矣尚有遺類乎瓊俗囂訟民競利害尺寸以上輒訴於府縣率連百數十人貪吏執為己利視賂予奪反覆剝取無厭民至不勝則棄業亡入生黎洞公得訟者列之庭下頃刻數語誨遣之中其情而不拘之法皆帖帖以去久而皆化訟遂息其亡而歸者萬三千餘人瓊之田歲三藝而少穫其糧給衛軍軍常以一時急征於民不得米則迫以他物利厚數倍民困之公令民歲三穫三輸之無敢違者弊頓革而常歲軍衛干撓府縣之政皆



斂迹矣獨其豪橫者猶不便公嘗竊伺其短將把持以  
騁久之無所得乃更心服曰其律身嚴如此吾可犯耶  
嘗歲大旱民禱久不應公嘆曰我之責也齋戒為壇露  
禱翌日大雨霑足獨城南十五里江外雨不及夜復露  
禱明旦公出閱番舶渡江雨隨公至如注暮乃止是歲  
瓊大熟公在瓊將三考其政清靜簡易而民樂之趨其  
令惟恐後雖黎峒之氓素獷悍不馴亦皆信從蓋瓊自  
公至富者循理貧者足給相安於無事而作新學校親

詣學舍誨飭諸生由是嶺南諸郡學生以科舉升者瓊  
常為最監察御史周敏巡按廣東還颺言於衆曰王瓊  
州真所謂安靜之吏日計不足歲計有餘者廣東布政  
使徐奇亦曰嶺南郡守政治有長者風王瓊州一人而  
已公去瓊民率其老弱送至十里海上拜且泣曰公往  
矣如吾民何蓋公盡心保民一出於至誠故久而人益  
親之公居家事親孝母病晝夜侍側湯藥必躬治而後  
進仲父罷官歸且老無子敬事如父治喪以古禮治家

以儉自足不為有餘計處富貴憂患一致謫安慶十年  
泊然自適為人清淳坦亮表裏洞然而恭儉簡默外物  
不足以動其中或問公可以行之終身之要曰循天理  
而已與人言必依於孝弟忠信所至無貴賤少長皆樂  
親之為文章出入司馬子長班孟堅韓退之柳子厚諸  
名家鄉先生陳心吾嘗讀之顧其學者曰後來文柄在  
此矣其學深於易而於書詩春秋皆博極其趣子史以  
下至暨卜陰陽方外之說靡所不通而時出其暨術以

治人輒竒效書法宗二王旁通智永歐虞皆臻其妙篆  
隸亦工蓋年七十有五而卒娶歐陽氏臨淄知縣日新  
先生之子繼室蕭氏子男二信與直也女一嫁楊子珩  
孫男八孫女若干昔龔少卿召信臣皆以明經為漢循  
吏易之道微矣觀公治瓊何以異乎南陽渤海之效為  
天下者所以重乎經術之士也故表諸其墓

如雲居士墓表

文淵閣大學士吉水胡公既銘其邑如雲居士之葬又

告士奇表諸其墓士奇與居士生同郡未嘗承顏接詞也嘗聞諸舅氏陳孔碩先生曰居士貴信義賤利者也吾始未識也嘗倉猝過之寓重貨焉後復過之則其居悉燬其貲悉喪矣吾既不復言所寓則入唁之居士出肅客取酒觴客盡懽然後悉出所寓歸之吾心知其義不敢言報但請舉半助為居室耳居士啞然笑曰公獨不知夏璉耶吾不敢復言夫今之人亦見有如居士者乎士奇識之後遇清湖羅伯崇匡山吳孟勤兩先生益

聞居士之為人曰涉獵書史通其大義性剛介遇事是  
是非非嚴於君子小人之辨雖屢以是召怨不變善談  
論每稠人廣坐娓娓出新意嘗游四方交其名人賢士  
與之下上論議歸而日尋山水之樂携朋徒囊琴載酒  
登高臨清更唱迭和逍遙徜徉姿意所適其資貌魁偉  
儀度閒雅蓋望而知為瀟灑絕俗之士也學士公亦言  
居士有孝友之行親歿寢苦枕塊宿於外祥而後已喪  
祭用朱氏禮家富於貲而泊然無他嗜好雅好蓄書籍

名畫尤好法書購積古帖頗多日臨寫有程度未嘗以  
事廢此亦可觀其志矣蓋陳先生始識居士故得其一  
事羅吳兩先生其塾賓故知之詳而學士公其肺腑之  
親又知之深也夫所得賢士大夫稱道之不一而足如  
此非實有諸已行之久而不倦曷以致之哉居士可謂  
奇偉廉直超然物表者歟居士姓夏氏諱璉字彥琛如  
雲其號也祖致和父仲賢母章氏娶蕭氏子男四人鼎  
卣車嘒女一孫男二居士春秋六十有四所著書有如

雲集石屋漁唱集藏於家嗚呼世所重乎士者豈必僭  
爵析圭有建立於時而後為可重乎苟德脩於身行於  
家直乎內不詘乎外見孚於當時不忤於古人蓋君子  
重焉若居士者世固不多見也故為之表

康仲矩墓表

深溪康仲矩既卒二十有二年其配楊氏使季子民獻  
齋事狀來京師授兄子士奇屬表其墓士奇先公女兄  
第十人今惟康氏姑在有命其敢辭深溪距泰和東南



兩舍許山水明秀康氏世居之康本匡氏宋避諱為康  
因襲焉宋南渡後有諱景明者官至同知桂林府事元  
有諱震者受學吳文正公博通五經尤用志於三禮以  
古文名當時嘗為慶洲書院山長學者稱匡山先生仲  
矩桂林之五世孫慶洲之從子也父宗器二子仲矩其  
長也諱規幼穎敏有立志成童涉獵經史是時安成寇  
掠泰和倉猝其父遇害母弟被俘仲矩子子袒跣葬父  
畢即盡貲負之匍匐走安成求得母弟以歸及兵亂稍

定家徒四壁而養母能致其樂辛勤闢蕪除荒治生計  
後益饒裕恒痛其父歿於非命未嘗得奉一日之懽也  
名其堂曰思親以見志撫弟季望極友愛治家秩然與  
人交久而益親鄉人有忿爭者得仲矩一言輒帖服喜  
賓客樂施濟嘗捐厚貲作石梁以便行者久而圯重作  
之不厭蓋年五十有一而卒將卒諸子請所欲言曰若  
等能力事詩書紹門戶吾所欲也不及其他其配元翰  
林待制吟窓先生之孫武山先生之子婦道母儀表于

族姻其子男六民凱民勇皆先卒民會民阜民獻民則  
民會出後從兄伯穎民則為季望後皆業儒女一人嫁  
羅季脩孫男十有一人今季望已六十垂白猶謹謹奉  
寡嫂如母家事必咨稟民阜兄弟皆敬事叔父母如父  
母不敢毫末自專一庭之間怡然肅然固本於仲矩之  
行之刑於家者歟仲矩卒於洪武丁丑正月一日葬團  
箕山之原士奇少孤父之執前登州府學教授郭敬守  
先生嘗告之先祖兄弟及慶洲君有金蘭之契既又曰

二家前輩盡矣吾懼其世好不繼也仲矩之婚吾實成之蓋仲矩嘗受學郭先生其固有所取歟卒之夷考其行事為康氏賢子孫楊氏賢子壻郭先生賢弟子也是宜表也

戴處士墓表

仙居戴處士歿張廷璧既狀其行及葬翰林編脩鄭好義又銘其墓處士之子宏演間來請曰銘藏諸幽矣惟先人之行宜表諸外者敢徵惠於執事宏演為人恂恂

惇實即子可知其父而張鄭皆吾友其為文不肯苟有稱說而皆處士同鄉也所論述矧又有徵哉遂表諸其墓曰戴氏世家仙居之戴里業儒術高祖某仕宋為郡學錄曾祖立之祖實甫父道顯皆隱居不仕處士諱蒙字養正少好學從鄉先生顧景南治尚書長而用力於濂洛諸儒之奧為人忠厚端確有行義每讀書至孝友忠義事懇懇以訓子弟慎交處有智畧元季兵亂所在草竊剽敗為民患獨處士奉母先幾遠去不罹於旤家

故富貴歲饑民聚謀發其廩處士聞之召至語之曰若  
饑而吾閉廩不仁吾廩而汝擅發不義曷如吾發廩汝  
均食之之為兩得哉衆皆喜且拜曰公仁人志存生我  
我等獨匪人而敢為不義乎悉計口給之天下既平郡  
縣以部符覈民田稅有欲虛增額以要利者處士實長  
徭賦里中爭之曰欺隱民之罪也如增額不實將厲民  
於無窮豈長民者之仁乎卒籍其實屬有造舟之役而  
董役者苛刻不可近處士之季父在行衆難其不任處

士躬往代之訖事歸季父曰微汝代行吾不生還矣推其田廬畀之不受季父母無子奉養之如父母季父母卒散其貲產均族人之貧者不私一毫治家馭下皆當其道鄉閭服其公平有事率往取直焉宏演舉進士為翰林庶吉士預脩永樂大典聞之喜曰兒克成吾志矣手書二百餘言備持身為臣之道以寓戒所居有園池之勝雜植花卉蔬品作亭其中名涉趣而自號園翁日與名人韻士觴詠亭上相樂也以永樂三年某月某日

卒春秋七十娶徐氏有賢行先卒子男三長和次寶次  
宏演嘗為監察御史孫男七女三惟處士學明於道行  
備於躬才猷足以達於用而僅施諸其家其鄉弗弘以  
彰固將有待於來世然吾聞其諸子卜日葬處士先後  
陰雨沍寒彌旬浹不已獨葬之日晴朗和暢衆蓋謂處  
士之行之應也非誠於為善其克致此乎過其墓者式  
之哉

贈中順大夫鴻臚寺卿楊公合葬墓表



洪熙元年正月制詔吏部為臣能恭謹勤事必推恩其親褒答其所自亦因以勸天下之為父母者於是施自近始凡在廷之臣其父母逮養者咸得生膺褒封不幸而不逮亦與光被于幽壤焉由是遠近之為父母者瞻望歆羨以為有子者之慶亦有反而自忤不能盡夫愛子之道焉者是時鴻臚寺卿楊善之考妣皆已謝世贈其考中順大夫鴻臚寺卿其妣恭人是年十月善改卜魏村社之原啟其考妣之故歲遷而合葬焉遂以吏部

考功郎中張徹所為墓銘謁拜言曰法得植七尺有加  
之石于墓然非文無以昭天寵發潛幽惟惠畀之楊氏  
之不泯也予曰嗟乎國家覃德澤于臣而泝及所生固  
重本之意其亦有勵忠之道焉為臣幸獲光寵其所生  
而必欲託諸不泯者固孝子之志誠推是心以事君亦  
將不墮乃忠哉則予於為之文又奚以辭按楊氏其先  
家太原之樂平元盛際有文舉者隱居不仕其子成字  
仲禮善之考也弱冠薄遊京都屬元季兵亂道梗不能

歸既內附洪武初占籍大興遂家焉仲禮為人沈毅闊達勇於善畏避不善若將毒已者平居泊然無所外慕一言一行之微必謹必信敬老字幼處閭巷接賓客咸能得其意而周急卹匱倒囊無吝色古所稱一鄉之善士若仲禮其幾之矣卒於永樂丁亥五月二十五日春秋六十有四其妣定興和氏淑慎之行克配君子先夫八年卒而日月同其夫春秋四十有二子男三善得祥孫男七宗宏容實寬寧定孫女四善由引禮舍人三轉

為鴻臚寺丞陞鴻臚寺卿以才能起名譽於今二十餘  
年豈非本於賢父母哉為表其墓曰楊之令考妣有歲  
于此自古恒言是父是子曰子賢否係厥父母不係世  
類厥亦多有有既啟之有嗣起之煒若楊氏邦人攸希  
行道過者高車式哉

東里續集卷三十二

欽定四庫全書

東里續集卷三十三

明 楊士奇 撰

墓表

彭原復墓表

此彭某原復之墓彭氏泰和西郭月池里名家其世系見余所著香山縣丞墓表原復大父志永父與材母郭氏原復兄弟二人原復其仲也世父與吾無子以父命為之後自幼孝友而謹厚喜親筆硯不與羣兒嬉狎十

歲為亂兵所俘行數日舍之去邂逅其父所交游故人  
遂依之然更二年乃得歸歸而父母皆歿先廬已燬無  
彊有力親戚可恃即自務樹立從學端家先生王子與  
明為人之道而貴重其行不肯以非義取諸人於生事  
亦落落不以屑意而處親戚鄉黨怡然執恭讓人無長  
少貴賤皆樂近之嗜飲酒然未嘗愆禮度嘗長里徭賦  
一時長徭賦者率怙勢刻削其民原復獨澹然寧損已  
以厚民以是尤見稱長者洪武庚午閏四月十四日以

疾卒距其生四十年矣配劉氏有賢德子男二詡嗣女  
三皆適人孫男二銘欽女四曾孫男一今子男獨詡在  
初吉安郡學聘為訓導試經義于翰林有聲譽會英國  
公請于朝求士教家塾時特勅吏部簡文學優等者遂  
奏遣詡衆皆以為不辱命也初原復卒同產之屬有欺  
其遺寡孤欲敗其業者日虐使詡蓋行道之所不忍當  
是時孰計詡之克立如今也哉雖詡有母之賢要必原  
復有以善其後者不可誣也鳥獸於其同產知相愛不

相賊也何獨於人哉雖憑其詐力馳騁一時矣夫固久而必定也彼有為之而不厭者觀於原復之後可以少戢矣表而著之其亦警俗之意也

故廣西按察僉事劉長吾墓表

永樂壬寅十二月十八日廣西按察僉事劉長吾卒於北京長吾吉安永豐人發身永樂壬辰進士永樂以來進士歷七科唯辛卯壬辰兩科取士最少就試皆三千人而所選皆不過百人然兩科之士其初擢官顯要者



最多至其後有政譽者亦多長吾其一也長吾諱某以字行系出晉安成太守劉遐世業儒祖思恭父子碩母李氏長吾幼穎異好學治書經年二十九舉進士歷事都察院踰年擢廣西按察僉事長吾居官有廉潔之行達於大體為政簡而明臨斷是是非非於用法得寬猛之宜未嘗苟為私謀嘗盛夏當巡按向武或言瘴鄉盍俟涉秋而行乎長吾曰職在視察民瘼苟取便已如民何凡行部所至必以廉察民隱為務唯民所欲惡而從

之少嘗受經劉子欽子欽後謫戍南丹長吾過之執弟子禮恭甚子欽亦自重不少損於是蠻方之人稍識師弟子之分同官陳賞巡按梧州卒適長吾過梧州特留治其喪遂以歸其鄉而并歸其妻子其行義大率類此融縣有戍卒兇悖為民患民耆老百餘人訴諸長吾廉得其實械送京師道卒會朝廷遣使巡撫過融卒之以父死蓄怨誣告長吾他事巡撫以聞都察院逮治長吾其誣竟直然未幾長吾卒年三十有九嗚呼惜哉長

吾娶周氏生子一人尚幼卒時獨一養子在側今將歸  
其喪葬永豐夫士之務學脩行恒患無所遇不得效諸  
用有所遇又患局於位不得展其材如長吾庶乎得展  
其材又不永其年非可惜也夫長吾之脩於身施於父  
兄宗族者其鄉之人固知之而其施於政及於廣西之  
民者蓋縉紳君子多知之而鄉之人未必盡知也翰林  
侍讀學士曾公既為著葬銘余又撮其槩表之授其家  
俾刻諸墓

王思賢墓表

處士姓王氏諱某字思賢王氏之先居廬陵之何山後徙安成連嶺至諱宸者始徙泰和邑西之南富里幾世至興祖處士曾祖也廷圭其祖也功廸其考也皆業儒不仕處士自幼嗜學善事父母而持其身治其家一以嚴雖富而其意泊然嘗盡失其貲產而泰然如未嘗失者於內備共養外給公賦皆親任之為人廉方謹恪而施之以和裕人有過未嘗輕言有所不逮導之使必至

馬於家之子弟率防範以禮與人交義而誠其公直為  
一鄉所服性不飲酒然喜以酒樂客客皆沉醉淋漓而  
處士獨醒其間相與傲嬉傾寫無間嘗自號獨醒老人  
前翰林學士解公為之傳蓋年七十有七而卒卒時遺  
訓其子孫惟詩禮以立身儉勤以立家而已娶羅氏繼  
蕭氏子男五人守一守訓守約守敬守恒其四人已卒  
今獨守訓在女一嫁賴九皋孫男八人維某某某某某  
某處士之葬也翰林侍讀王君直既銘之守訓復命經

來京師求余文表墓余家距南富一舍而近嘗聞其先世當宋之亡也奮義出力從文丞相勤王之師丞相數過留其家愛其一門昆弟子姪皆俊爽特達為大書續槐精舍以督勵其學其先之所為見重於世也如此處士雖逸居雲林泉石之間未嘗一出以效用而考其脩諸躬施諸人者蓋於其先無忝矣而至於今如經如維皆力學將以致用且其來者又益勤而未已也而皆處士之所啟矣然則處士其宜有表哉其宜有表哉

李氏黃塘阡表

無錫縣儒學教諭廬陵李湛孟昭滿三考陞府學教授  
需次于京師圖其先世所葬黃塘阡六墓并述其槩屬  
余表之余諾之未有復也湛以疾卒於京師將卒命其  
子璉必請表鐫諸墓道璉遂泣拜致遺命嗚呼余於湛  
老友敢忘平生之言哉按六墓其中湛始祖四承事所  
合葬其右始祖之子或孫蓋失其世序字名不可考又  
右湛之曾伯祖榮卿其左則湛之曾祖晦卿而其祖伯

復又祔曾祖之左又左而後數十步湛母江孺人云李氏故廬陵士族其先居衡州與宋忠臣湖南安撫使芾同宗至景嗣為承信郎吉州孔目迎其父母就養父即四承事也愛吉州士習之盛遂卜居郡城之西孔目在吉適安撫公為守以親賢特相厚善蓋其為人博學篤行所著有委順子呻吟集二子榮卿晦卿也晦卿號樸菴明性命之學守正力行排斥異端所著有勵志集識過錄又取朱子首歲表年因年著統之義著百世一表



傳伯復號復齋當元之盛際樂道不仕而剛正自持所  
著有見心錄承家錄又輯古今老釋之事著辨惑錄李  
氏文獻之傳可為盛哉吾少獲拜湛之父克貞先生矩  
度雍容官至橐城丞文行政治蔚然有重於時後接湛  
於儒林藝苑之間溫然靜貞而有守其仲氏孟謙學行  
亦不忝其父兄夫有肇之於前又有紹之於後如李氏  
不謂之盛可乎褒衣博帶論說古今孰非士也而必明  
夫學之正必見諸行之實不為枉道徇俗而至於累葉

不替益加如李氏焉者蓋亦鮮矣李氏非廬陵之望乎鄉人士有過黃塘之阡者式之哉

故黟縣知縣贈承德郎刑部主事嚴君墓表

洪熙元年某月刑部清吏司主事嚴珊蒙上恩賜勅贈其父祿以珊之官階承德郎而贈其母程氏為安人於是珊踵余門拜且泣曰先父之葬也鄉先生前左春坊司直金君志其幽矣惟上之寵命及先德之施於時宜表示來世者未有託焉幸矜而畀之珊嘗從余在翰林

六年勤學勵行其去為秋官屬能聲日益焯焯蓋於子  
可知其父矧又有如金君所志者哉考志嚴氏其先居  
睦五季有為令於衝之江山者因家其邑之瀆口里至  
宋宣和中名賜者徙開化之龍山既徙而族益盛鄉人  
號其地曰嚴村賜八世至浩然浩然生得華得華娶徐  
氏祿之大父父母也其上三世皆不仕祿字伯宜始用  
薦者為太僕羣牧官三歲罷羣牧改國子監掌饌又用  
薦陞閩縣知縣復改縣其為掌饌也自大司成至六

館之士皆譽之其為閩縣也壓以會府貴臣之尊且衆而朝命之使及海南諸蕃國貢獻往來宿頓供億之繁應接趨走無寧斯須伯宜從容事集而民不擾也賦舊十倍他邑民不克堪伯宜力言於府平其賦民至于今賴焉為縣也愛民如閩尤篤意於興學民甚嚮服蓋無幾而卒於官伯宜自少好學師事從兄好禮好禮官思恩臨汾建平不憚險遠率往從之事親孝事其兄伯謀凡田宅臧獲器物惟伯謀所欲而已取餘焉養孤姪

始終同己子處族姻閭里咸得其心尤汲汲義舉其施  
諸家與鄉如此宜其政之行於人也卒以永樂辛卯五  
月二十四日享年五十有七初娶程氏宋秘書少監洞  
之後繼戴氏子男四瑄珊珣環珊永樂十三年進士自  
翰林庶吉士陞今官女一歸戴鎧孫男三女一方今明  
詔數下令中外舉堪任守令者付之撫綏之寄又嚴戒  
貪墨重舉主連坐之令期必得人中外之臣皆惴惴不  
敢苟且有言恐負德意嗚呼如伯宜之才之德豈非其

人哉惜乎其不可復作也士懷有用之具際得用之時而屈於命不克以究其施徒使後之人思之而不忘豈非可惜也夫抑亦可嘅也夫

王處士墓表

余與少保澹菴楊公同在翰林四十餘年今閒暇相與私論屬官之賢之衆共私喜前此所未及也蓋今之賢者具四方若荊湖之賢檢討王振其首也少保公又言振之得於家者有自因及其父處士君之德善處士蓋

篤行人也余心識之一日振奉少保公所作處士墓銘  
介其僚編脩蕭鎡求余為表余不可以辭按王氏其先  
自蒙城徙荊州之某邑六世祖邦直仕宋至侍郎祖諱  
琦仕元為迤南河泊官考諱文才處士諱某字貴華貌  
清儀肅知學問明大義居心以不欺為本有孝友睦婣  
之行性和易而耿介毅然非其義一芥不苟取自用澹  
泊而能捐利以仁其宗族鄉黨恒積穀間遇儉歲盡出  
貸賑嚴於教子常勵之孝弟忠信子若孫有過輒怒不

見必改乃已每諭之曰為人但常省已過不當言人過

又曰士持行當如

闕

虧為終身之累振選鄉貢上

京師縣令丞贖

闕

數百緡處士力辭已而顧振言此

歛諸貧民者

闕

仕而可受不義振服膺惟謹里有

競爭必於

闕

平未嘗以私掩公守令以下所共敬

禮方岳大臣過者咸見存問春秋八十有四視聽不衰

容色腴澤如頰玉卒之日弔者哭皆哀遐鄉僻陋其耆

耄咸往會葬非其素積誠不已何以致此哉娶孫有婦



道子男三孟思聰仲思忠季即振宣德庚戌進士授今  
官女一嫁劉俊孫孫男若干處士之卒以宣德丙午九  
月辛丑蘇文忠公有言稱人之善必本其父兄若振見  
重於縉紳君子非本諸處士乎吾故表之以告夫世之  
為人父者

中順大夫興化府知府李公墓表

李氏之先出唐宗室燉煌房五代時避地于越後之台  
之寧海家焉見黃文獻公集中霽峰先生墓誌霽峰先

生當宋末元興之際以高文遠學重於時文獻蓋其考試浙省時門生云霽峰於興化為高祖曾祖諱栗祖諱炳考諱塾明書詩春秋洪武初分教華亭縣學因家焉後為鄜州同知卒於官歸葬華亭娶華亭沈氏興化其子也諱銅字至剛號敬齋以字行少穎敏不羣嘗從學楊廉夫為詩文有清思洪武戊辰舉明經奉命侍懿文太子初授祠部試郎中既實授坐累謫戍邊無幾召還為虞部郎中尋陞河南布政司右叅議會河決汴隄居

民危懼公建議假王府積木作筏濟之人賴全活甚衆  
調湖廣布政司左叅議太宗文皇帝入正大統公來朝  
大臣有言其才且洪武舊人遂以為通政司右通政方  
脩洪武實錄公與焉旦莫在上左右道說洪武中事甚  
親密是冬陞禮部尚書時禮部之務叢脞公長於剴繁  
條理井然益見寵遇實錄成有白金文幣金織衣之賜  
永樂二年春冊立皇太子命公以尚書兼左春坊大學  
士東宮開經筵公與右坊大學士解縉最先進講及脩

永樂大典四方文儒皆集仍以公董之無幾為侍郎宋  
禮所間見疏歲餘降儀制郎中然遇劇務必以屬公解  
縉素厚公既遭讒出又以公言其怨望後召下獄而并  
下公仁廟嗣位念公舊宮臣復以為通政數月又念其  
老不任朝叅改知興化府時朝廷方需仁澤於天下公  
仰祇德意勞心撫綏郡民德之甫再歲歿于官宣德丁  
未七月四日也享年七十娶孫克配君子子男二長瀛  
次源永樂甲辰進士疏通明敏自驗封主事陞員外郎

方嚮用於時嘗得推恩追賜父誥命及贈母恭人女四  
長嫁盛衍次嫁太常少卿鄭雍言次嫁王瑄次嫁考功  
主事宋琰雍言琰皆進士發身孫男八女三曾孫男一  
嗚呼公厯事四聖凡四十年入典邦禮輔儲君出佐藩  
翰守名郡顯榮光大矣雖間厯夷嶮然回眎同儕輩覆  
敗消亡何可勝計雖或存什一於千百而求如公之歸  
然享高壽都重爵從容考終何其少哉況又有後嗣之  
卓然奮起而繼承之謂非所存之良所施之厚有以致

之乎余與公同朝久源既請少保楊公銘公之墓又請  
余表於是乎言

李貴祥合葬墓表

龍泉泰和其壤地相接如東西家其人邂逅於遠外相  
親如素厚善苟有行義可稱相愛願不啻如已出吾始  
見李九疇於為進士愛其言質而禮恭謂將不辱於鄉  
郡後又見之為御史愛其奉命而敬事謂將不辱於朝  
廷以是數往還而益聞其世其家知其有所自也今九

疇喪母將歸合葬於其父之墓而縗經拜余請曰不肖  
不孝無以報父母大德於萬一願圖不朽於執事余哀  
之為表其墓曰是為李貴祥甫及其配合葬之墓李氏  
世家龍泉貴祥甫諱英其孝友行於家忠厚施於鄉公  
方平直嘗裨於邑大夫之政永樂三年某月日卒春秋  
六十有九其配蕭氏於事舅姑相夫教子靡有不盡永  
樂十九年某月日卒春秋八十李氏之先曰榮其祖曰  
真淑其考也曰九成九萬九疇其子也曰某其孫也銘曰

卷三十三  
凡世伉儷比德者希懿此室家合璧相輝生同其居歿同其穴後有承之式閔其閼

王堂墓表

元良吏淮東道宣慰副使王公有賢孫曰維政自少負邁往之氣遠大之志操執剛正論議高明素欲有所見於世不幸不遂大施以卒今四十餘年矣有老耆知君深而尚存者往往與少者道君之才之行而未及展施以為悼惜噫非實有諸躬其何能使歿世而人不忘之



若此哉維政諱堂洪熙元年以子鉦貴贈翰林脩撰承  
務郎封其配史氏為太宜人脩撰君曾祖諱理元累贈  
朝列大夫祕書少監騎都尉追封太原郡伯事行見虞  
文靖公所撰墓誌祖諱艮即宣尉公事具國史及黃文  
獻公所撰墓碑考諱仲廬元紹興路總管府經歷妣徐  
氏封宜人脩撰君自幼穎悟七歲能賦詩老長皆奇之  
進從學鄉先生唐處敬讀書日十言終身不忘方肆力  
於古人雖值元季兵亂未嘗輟也國家平定之初君之

父以元故官謫濠梁君侍行躬勤孝養後奉父還鄉辛  
苦闢草萊治田廬有詔發兵民築緣海城邑大夫推舉  
君率民就役撫馭規畫悉有條理民不困而事先集他  
之率兵民者多效法焉有司以賢良舉送君京師奉命  
使蜀還奏稱旨得疾歸既瘡時太康王師魯為浙江布  
政使表然一時方岳之望其所用簿書史必慎簡賢良  
知名之士遂采輿論舉君為掾凡所言與行皆愜王公  
之意被檄督賦嘉興有推官不為君所禮銜之推

官後坐賄徵下京獄造誣詞連君逮至誣竟直未出京  
以病卒洪武廿四年十二月廿九日享年若干太宜人  
史氏系出宋宰相浩父諱本贈中大夫資治少尹河南  
布政司右叅政妣吳氏贈淑人太宜人天性純明涉書  
史通其大義蚤喪母凡事二繼母皆得其懽心繼母高  
病療家人畏傳染皆走避獨躬侍湯藥不去左右者幾  
再歲暨終無幾微怠意而竟無恙既歸王氏家徒四壁  
躬勤紡績晝夜寒暑不懈用佐脩撰君殖其家卒以饒

裕脩謨君初舉賢良意未欲就或導之詭辭以規免者太宜人於屏後竊聞之謂脩謨君曰事豈當僥倖斯言必不可從脩謨君曰吾豈惑於彼哉脩謨君歿嚴於教子冠昏喪祭皆有品式治家馭下睦族及鄰咸當其宜有智識凡審幾料事率豫中平素不信機祥不惑祠禱而頗好內典年將八十康寧和豫勅封命下子孫合內外幾五十人奉觴上壽鄉里以為善德之應宣德八年九月廿二日卒享年八十有五鈺奉合葬于脩謨君之

墓子男二長鍾先卒次即鉦女一嫁樓璉孫男六女二  
曾孫男六女四鉦永樂十年馬鐸榜第一甲進士及第  
初授翰林編脩陞脩撰正統初朝廷作新學校慎簡文  
學行義堪為師表者授風憲之職俾董一方教事擢鉦  
為按察僉事賜璽書命往江西瀕行以事狀求表其考  
妣之墓鉦與余交廿有五年蓋余畏友也孔子曰魯無  
君子斯焉取斯然則其考妣余可以無言乎敬為之表  
封宣義郎都察院都事熊君墓表

宣德中朝廷簡用太康顧公佐為都察院都御史賜之  
璽書俾罷黜貪汙滌弊蠹一清憲紀於是顧公舉南  
昌熊尚初為院都事都事幕佐凡都御史之敷奏施令  
一切簡牘必經於幕所係之重不與他官等尚初練達  
詳謹無滯事無過舉顧公良重之後尤見重於繼顧公  
者尚初才名遂有聞於京師朝廷賜勅命嘉勵之以其  
官封其父景方尚初既陞經歷為幕長於都憲數年而  
景方卒知之者皆嘆曰非此父不有此子惜乎哉於是

尚初縗經拜求墓表之文按國子助教李洪狀景方篤於教子尚初始授七品秩需次于家恒戒之曰寵命雖可為吾榮然必他日能守官不貽吾憂乃足榮也及授官又勵之以慎勤和恕為持已舉職處人馭下之道且以不欺為本孜孜勵之而不倦其子亦能祇率弗違斯其所繇克承官而致譽者歟古君子稱人之善必本於父兄其不虛矣然考景方他善尚多家居有孝友睦姻之行故裕於資儉歲恒出以賑匱乏有就之假貸而不

能償者即已不復問就之傭耕必豐其報有司嘗推擇掌里中海艘之役里人共貸白金六百兩市材後不能償景方獨損私償之不以及衆非能仁其鄉者歟景方自少務學問為人坦直剛毅薄於自奉而厚於賓客即所居作三堂曰一敬曰維清曰嘉會二樓曰復古曰凝碧皆以怡老而樂賓大夫士多為之賦詠非瀟灑絕俗者歟其諱紀字景方別字松節其卒以正統七年十一月五日享年八十有六其世居南昌之盧觀五世祖雲



卿宋右補闕祖敬昇考中立皆隱弗仕母劉娶徐子男  
二長即尚初次尚爵女二長適程子良次適陶朝洪孫  
男六女四嗚呼景方察諸其行觀諸其膺驗諸作善之  
應展乎有徵表諸其歲來嗣其承

贈奉政大夫吏部考功郎中畢君合葬墓表

吏部考功郎中畢昌踵門再拜奉其所述考妣之行實  
求余文表墓昌官京師二十年溫恭廉慎如一日余素  
重之而余忝內制時目睹其考顯祖妣駱氏兩膺朝命

受封及贈蓋又念非其考妣躬脩德善曷以致斯遂撫  
所述而書之畢氏世家杭之仁和自其先務勤儉蹈忠  
厚在元曰仲義及子進皆隱居不仕顯祖之大父父也  
洪熙元年封顯祖承德郎吏部考功主事其配駱安人  
宣德八年贈顯祖奉政大夫吏部考功郎中駱宜人顯  
祖諱如其字天資淳質志尚澹素自幼勤苦以承先業  
孝養父母睦於宗姻鄉黨與人交久而益親平居簡默  
而言必度理行必顧言人有善稱譽之不置不善必為

掩蔽於愛子姪循循化導恒延明師教塾中而躬考其  
成績於內每戒其子曰吾少遭兵亂弗克問學汝曹幸  
生太平又不勉力是自棄矣誠能自勉匪直可以榮身  
蓋榮親亦由此矣其襟度夷曠善飲酒而終不亂晚歲  
暇豫日與故人朋侶放情適意湖山之間超然如游物  
之外者既享祿養承恩封洊然不一芥動於中而持已  
愈謙下蓋春秋八十有三而卒其生元至正戊子四月  
七日卒於宣德庚戌七月廿六日其配婦德母道式相

君子春秋七十有八生至正癸巳二月廿三日卒於宣  
德庚戌二月廿五日合葬錢唐縣包家山之原子男四  
長富琮次富禮次昌永樂乙未進士吏部考功主事陞  
郎中次盛女一適徐文義孫男六昔考槃詩人詠隱者  
盤桓寬廣有自得之意若畢君非其幾之歟畢君所存  
幽貞澹泊而臻于耄年非孔子所論靜壽者歟雖其不  
生被榮命而既歿之後命必及焉又以見為善之應雖  
遠而必徵也後之過其墓者式哉

故封從仕郎中書舍人周君墓表

嗚呼士習之不古若也或心不存夫仁身不率夫義也或不務乎孝友睦婣也或學不講而道不聞也或惟利之甘而欲之騁也往往得身後之譽於時貴人顯卿也嗚呼其可以觀世也吳中周璿之喪其父從仕君也求表墓於余蓋余以耄疾謝不能也璿示所述從仕君之德善質而不浮也曰事親食飲必躬調勞動必躬執親歿居喪不違歲時薦祭必潔也與其兄處怡怡兄分教

吳庠坐累死家徙他郡極力恤其遺幼孤從兄歿孤女不能嫁嫁之如己女也婦翁以閭右徙實京師歲久家落資給之無虛月翁死歸其喪葬于鄉翁之子逮繫獄數年又力資之及其遠謫迎養其母且教撫其子也其友寓官布千匹其家將以充賦京師者一夕傍舍火倉猝起護所寓出而已室燬不及拯其友德之請助作室費一毫不取也其少嘗充博士弟子涉知春秋大義也晚教里塾從之者恒百餘人訓其子及學者必約之務

本淳實也郡邑舉鄉飲必見禮致也用子貴賜勅命封  
從仕郎中書舍人享祿養十餘年雖老而敬慎自執無  
厭倦也余閱之歎曰其宜表也其諱恕其字仲立別號  
存翁也宋有為撫衛司兵馬鈴轄南渡時自鄆陵移守  
泰定州遂為蘇人而歷世崇儒醫其先也諱子華諱繼  
善元平江路醫藥提舉其曾大考大考也諱極隱居教  
授娶顧其考妣也陸氏封孺人其配也璿璣瑾瓊其四  
男子也璿今為中書舍人璣寧波府學教授皆其所成

也曹煜沈珪其二女子壻也孫十有四人五男九女也  
春秋八十有四其壽也正統己未十有二月庚辰其卒  
之歲月日也長洲縣彭華鄉金盆塢之原偕其配所合  
葬也并為誌之俾來者有考也

彭叔敏甫墓表

監察御史彭勗奉勅提督南京郡邑學校有成績天官  
卿奏其最凡再以余同鄉郡過余言曰勗不孝不幸生  
際有道之世仕於朝得祿不逮養父終身慟也重不幸



者令仕於朝一考而最得推恩封贈父母及最當如令而格於新例未即得最惟是朝夕不遑寧也又念先君之墓木拱矣而墓上之石未有刻辭幸先生哀而畀之遂出少傅建安楊公所作墓誌視余按御史之考諱某字叔敏杏隱居士所自號也彭氏唐天祐中有諱玕者為吉州刺史至諱思永宋治平中為御史中丞皆居廬陵之山口里其後至少英及其子子淳皆從文丞相舉義徙居永豐新陂又徙龍潭之西杏隱之高曾也祖貴

德號雪厓明經教授考諱景忠兼業醫杏隱承其業而造詣益深凡所愈疾不責報有贈之衣服飲食輒持歸獻父母父歿母張病瘵十餘年旦暮侍左右飲食湯藥衣服盥漱坐臥扶掖皆躬任之母歿里俗瘵死懼染率火化杏隱力拒羣言棺斂如禮父母歿皆哀毀忌日祭必悲歲時先祠薦奠必誠必謹厚撫諸弟及兄弟之子訓育婚嫁咸盡心禮聘名儒於塾為子弟師為人溫雅謹飭言動不苟不妄交際而處宗姻鄉黨怡怡雖有拂

逆不見詞色人皆多其長厚二子皆有官享祿養者十  
九年宣德八年十月日卒春秋七十有五葬里之小金  
岡配黃氏子男二長勗永樂己未進士南雄建寧兩府  
儒學教授遂擢御史有賢聲於時次昂會試中教官選  
今為唐府伴讀女一歸劉伯端孫男十一女六曾孫男  
二洪湖凡世有大功德者則見之銘與表如杏隱君其  
持身處物固皆善德矧其誠孝尤德之大者是宜表也

陸守道墓表

姑蘇蕭仲南從余在翰林廿有餘年其為人質實靜重不苟干請間以其甥陸某來拜求表其父守道之墓余念於守道未嘗一覲顏一接辭也謝之再三仲南曰果非其行有重於鄉可傳於後其奚敢瀆備道其平素且出其事狀及吾友張君宗海所為銘墓之文覽之而信為之書曰陸出吳荊州牧抗之後世家長洲其高祖盛始居陳湖之上積善以植家曾祖榮甫人有就之鬻田者必增直予之或譏其近名曰貧極則鬻田吾卹其貧

耳祖仲祥父文伯家益富恒自念富不蹈義怨將萃焉  
而所行未嘗違義母張氏守道諱禮醇厚明敏自幼有  
孝弟之行而親睦宗黨喜學長從明師講授即謹於義  
利之辨遂博涉書史永樂甲午朝廷用舊制選用才賢  
於富民中守道與焉召至屢奉使於外不辱命未授官  
援例暫歸再召以疾不果行其初被召也付家事二子  
以友恭書其堂諭之曰汝兄弟了此即百事當矣及歸  
種橘軒外又諭其子曰種樹與種德同封之厚溉之時

而常視其蝨去之斯根本固生意達而葩實蕃碩矣其  
訓於家槩類此嘗以白金百兩貸其友之子未幾其友  
坐事當遠謫子倉猝償貸守道曰若父吾友也願以贖  
卒不受償有華某者同被使命出華中道病疫其從者  
畏而逸去守道獨扶持之躬煮藥與粥飲食之華卒具  
棺斂殯之馳書其家歸其喪歲饑屢發廩賑貧者凡久  
貸不能償者輒焚券鄉人貧者病予之藥死予之棺耕  
乏種子之穀皆不可數計其施於人率類此平居謹言

行處人以誠襟宇坦夷不事表襮雖富意澹如也喜賓客敬久不衰閒暇讀書賦詩以自適宣德九年七月廿四日卒享年五十有九配吳氏子男二珩瑄女一歸張樞孫男三女三嗚呼自井田廢而兼并起強凌衆暴久而益甚數十年來富家豪族豺虎其鄉人者大江之南莫甚吳越前數年朝廷遣使巡視扶植其善柔薪除其彊暴蓋已肅清而比聞故習稍稍復作何其沉溺之固而不知省也然亦曷嘗無善仁者哉孔子曰十室之邑

必有忠信吾於守道徵之矣故為之表陸氏之後尚世承之勿替

韓母太安人王氏墓表

太醫院判韓叔暘之母太安人卒於鄉叔暘奏乞奔訃歸上尉諭留之賜鈔三千貫明日復奏乞歸上復留之命工部遣官營葬叔暘既拜命退奉國子祭酒具宗魯所狀太安人事行介其同官蔣主善求文表墓余於叔暘有同朝之素誼不容辭按太安人姓王氏諱妙安世



家蘇之嘉定族衆而產殷父某母某氏父洪武中以貲  
長萬石區坐累謫滇池以其家行太安人始并性行端  
淑父母甚愛之雖旅瑣中必謹擇所歸時金華韓伯器  
亦寓滇中行義為衆所重且遽於醫方求配遂歸韓氏  
敬事君子躬勤與儉相之植家而家用豐後朝廷以名  
醫徵伯器遂挈家北歸至京師太安人念韓氏之先塋  
久曠展省也請於伯器與其子歸武義既復至踰年伯  
器卒居喪如禮遂及其子奉襯歸葬於鄉而益篤教子

恒曰汝曹所當嗣者世業而尤當嗣者世德嗣世德必在於學勉之母怠後叔暘仕於朝蒙恩贈父以己之官封母為太安人太安人拜命既族寓書勵叔暘以敬慎毋孤國恩忝父母其待諸子及婦均一恒訓以義方於族姻惇恩意馭下以恕平居務善而避不善閨門秩如也享祿養者十年雖春秋高而康寧和豫忽得疾藥屢進竟不起宣德九年正月十六日也生元至正二十二年八月一日享年七十有三將以卒之年某月某日葬

某鄉青草山陰塔石之原祔夫之墓子男十今存者仲  
暘叔暘季暘孫男四傑儀健侯孫女五叔暘倜儻卓卓  
精其父之業永樂間以名醫徵詣太醫院簡事今上於  
春宮勤慎小心久而益恭上嗣大位超授太醫院判恩  
遇隆厚凡所被賜賚必先以奉太安人而後及己人皆  
為太安人榮而太安人恒執謙不自伐也嗚呼人之賢  
必本於父母太安人訓飭其子惓惓於世德而躬自蹈  
者其德老而不懈若此信賢母哉信賢母哉遂為之表

張母太孺人董氏墓表

宣德甲寅有旨封貴州道監察御史張君慶母董氏為太孺人命未下而太孺人卒以卒之明年葬今禮部侍郎王公為之銘墓又四年慶求余為墓表慶篤實清謹力學有文舉進士為御史以重厚稱蓋慶蚤喪父一本於母之訓也母之墓有表固宜按狀董氏邑故家宋叅知政事德元之後也父天成母曾氏太孺人自幼善女事熟女誠諸書而貞淑閒雅鍾愛於父母長歸同里故

家張孟芳太孺人於事舅姑至孝無幾舅卒時徭賦方殷孟芳年雖少日竭力赴公太孺人亦力於內助事率蚤集已而佐夫殖家居宅資產咸加於前孟芳卒太孺人悉心教其子七男三女嚴於夫之存也孫曾後益衆申禮教以防範之太孺人平素於薦祭致嚴於賓客有禮於臧獲有恩於家之長幼貴賤衣服飲食之給咸有定序嘗歲甲申大歉里富室率閉廩不發太孺人計其家所儲穀萬餘石量足歲給外命其子悉平價以糴隣



人其脩於家施於鄉為善有誠宜其有賢子而孫與曾之益繁也天道福善之云不其然哉不其然哉是為表

王母曾孺人墓表

泰和之西鄙南富里王氏有賢母曾孺人卒而葬今二十餘年鄉閭族姻稱道其德善嘖嘖不已蓋於余從伯母為同產兄弟從兄思貽先生嘗寓書京師致其子之意求表其墓屬余侍從之北京未暇也歷七年其姻家貴州按察僉事郭公緒申致其子之意余諾之是時其

孫綬在京師遂以前韶州府學訓導歐陽源所具事狀  
來余讀之嘆曰孺人素行如此宜乎鄉閭族姻稱之不  
厭而為之子者必欲昭于遠歟曾故萬安龍丘里名家  
世積善某娶郭氏孺人之父母也孺人諱莊天資柔靜  
自幼涉知書祇姆訓勤女事好惡不失其正家雖富清  
素簡約自持其歸王氏為思齊甫之配王曾門資相埒  
而思齊甫傑特不凡孺人相於內事舅姑盡孝道治家  
條理秩秩元季兵亂以其闔門竄避山谷不改常度亂



定歸盡喪其資產無幾又喪思齊甫孺人時年三十有三謹禮度而乳乳育其子一男一女茹苦服䟽躬勤蚤莫用再植厥家一如思齊甫之存也教成其子男有室女有家庭戶之內尊卑貴賤肅如穆如蓋鄉閭族姻所共稱其尤難者也其卒以永樂乙酉某月某日享年六十有九其子男守貞女之夫即歐陽源孫男三長統次紱永樂辛丑進士萊蕪知縣次纁女二曾孫男四嗚呼人之善行蓋難得於憂虞艱窶之際矧為女婦當嫠居

窮處乃能秉禮從容以卒有立如曾孺人者非賢而能之乎非賢而能之乎是用兼采衆言書諸墓石以稱其孝子之意

中軍都督僉事李公夫人王氏墓表

婦德以孝敬慈惠為要孝以奉上敬以奉夫而正家慈惠以及下或一闕焉則婦德不備備未有其家之不興也世去古遠女教不明德之備者蓋亦鮮矣觀於吾友沈民望所述李夫人王氏之行其庶幾乎此歟夫人之

子芳以其父都督李公之命介太醫士孫公器來求文  
表墓王氏世家江西之番易其曾大父諱才洪武中以  
軍功積官至遼東都指揮僉事大父諱文昌襲金川衛  
指揮父諱文義早世季父諱文邦代襲其職調錦衣衛  
夫人諱妙慶生長勲臣之家而閑姆教涉知書精女紅  
事父母篤敬愛為族姻所重既笄歸都督公公名福李  
氏世居河南鄆陵亦以武功起家都督公襲其父職從  
征伐積勞勲勇智出倫進官督府夫人自為婦事舅姑

生養死祭致其誠敬如事父母睦於宗戚嚴於訓子待  
媵侍有恩惠天資慈恕未嘗作於言色閨闈之內肅雍  
有常躬執儉素雖貴富不渝其下化之於婦道妻道母  
道庶乎備歟春秋五十有九子男一即芳婦王氏後軍  
都督同知王公或之子女一在室都督李公數年奉命  
率師備禦海道得以專其智慮致力於公使邊方千里  
肅清無虞而忘內顧之憂蓋以夫人之善於家政也古  
者公卿大夫之妻其德行可稱或詠於詩或書之史皆


有聞於後今之世如李夫人者其宜表哉是為表

故羅母劉氏墓表

洪武三十三年九月五日西昌羅母劉氏卒既葬縣西北十里楮原靖江府長史蕭用道銘之矣其子孟敬等又介蕭建平來求表其墓余謝不知狀建平曰母世居泰和城西考與權妣鄭氏生有淑德時仁壽居同里弱冠考均瑞妣劉為擇配良而母歸焉既入門以事父母事舅姑姑病湯粥藥餌必親煮以進不使餘人夙夜侍

側無怠色姑曰新婦盡孝故事我願新婦子孫亦長盡  
孝故事新婦又以和處其族姻以恩使在下者以勤儉  
佐其夫殖其家教其諸子敦忠厚崇詩書時鄉先生蕭  
尚仁教其塾館戒諸子若孫必敬奉教誨毋違慢以辱  
先生命晨夕饕餮必躬調潔清然後進先生沒其子今  
長史公用道繼焉奉之亦如先生間其子若孫從他先  
生長者自外來皆厚禮待之故其子孫游從薰炙多雅  
飭循循年五十仁壽沒貞謹自持歲時諸子孫曾若婦

孫之婦合六十有餘人列左右序次升堂上壽滫瀡錯  
陳慈顏悅和可謂福也矣而亦豈偶然者歟卒時年七  
十有六子男七人某某孟遜先卒某某孫男十有  
九人女十四人曾孫男八人女十人余得諸建平如此  
建平端重而信且余與羅氏同里閑故為表之使世之  
歆羨於福者知其有本



東里續集卷三十三